

摘藻堂四庫全書薈要

集部

欽定四庫全書蒼要卷一萬八千三百五十一

集部

御選宋詩卷四十四

五言律詩十

梁相

春日田園雜興

麥疇連草色  
蔬徑帶蕪痕  
布穀叫殘雨  
杏花開半村  
吾生老農圃  
世事付兒孫  
但遇芳菲景  
高歌酒滿尊

周暕

送僧歸蜀

詩禪寄杖錫不問道途難到水浮杯渡逢山卸笠看悟  
空諸念寂傳佛一燈殘蜀國又歸去令人憶道安

寄悅上人

一錫千峰遠聞師住少林雲生坐處石佛見定時心清  
福人間少紅塵山外深何當重問訊來借竹堂吟

楊本然

春日田園雜興

露畦煙陌裏名利等秋毫引犢隨牛放祈蠶望蠶綠和  
根挑薺菜帶葉摘櫻桃讀罷歸來賦臨風欲和陶

陳君用

春日田園雜興

世事不挂眼寄情農圃中鉏犁衝曉雨杖履立東風  
穀驗仁脈澆花趨化工獨餘真意味濁酒自燒菘

王鎡

別虞君集

瓦瓶擔酒去送客石橋東潮打沙汀上船迴島嶼中桃  
花三月雨楊柳五更風明日思君處渡頭煙水空

送默然上人歸天台

孤雲不定心持鉢度寒林野飯青蒲潔客程黃葉深海  
風潮水發山雨曉煙沉歸到石橋上應看瀑布吟

買舟

赤欄橋上路幾度卜歸期流水無迴日行人有老時潮  
來江勢逆月出海門遲風順輕舟駛蒲帆盡夜吹

早行

客程因太早却費一更眠  
落月已歸海殘星猶在天  
櫓聲荷葉浦螢火豈花田  
隔岸誰家起青燈遠樹邊

別黃吟隱

飲乾分別酒話久未移舟  
潮水催行客海山生遠愁  
蟬聲秋浦樹雁影夕陽樓  
今夜相思夢蘆花第幾洲

訪翟梅山

諸老彫零盡江湖今有誰  
半生行客慣多難識君  
遲花

屋春風酒梅山雪夜詩莫為名釣出世事正如棋

晚春即事

雲氣不分明天陰忽又晴喜涼溪鵲浴知雨樹蛙鳴  
仙藥黃精飯齋蔬白榘羹惜春吟未就閒踏落花行

感秋寄白雲趙寺丞

囊裏不藏金相隨只破琴每因看月夜長動故人心  
敗草關河路秋風楚越砧愁來不成寐壞壁更蛩吟

谿村

水路隨山轉谿清踏軟沙斜陽曬魚網疎竹露人家行  
蟹上枯岸飢禽衝落花老翁分石坐閒話到桑麻

寄友

髮影明寒鏡蕭蕭亦自憐故人難會面行客又經年晴  
雪添崖瀑春雲雜燒煙相思有書札寫盡夜燈前

羅公升

旅坐

負却征塵債飄零迄未休孤篷江貯夢深巷雨添愁山



色分濃淡禽聲互去留班超亦良苦萬里覓封侯

秋懷

舊日方山子淒涼寄一簞蟲聲來倦枕秋思入凭欄已  
是肱三折那堪指一彈中宵更風雨誰念客羶寒

辟地

四海風濤日誰歟柱急流山東雄劇孟薊北化田疇氣  
靜天閣晚星沉戍角秋如君關氣數寧不重婆憂

得聞家信

乍喜平安報俄增放逐愁親闈萬里老客境四時秋意  
往形空在詩成影自酌東風嚴瀨下不是欠扁舟

趙善璫

避地山中和湯推夜寒韻

山藏皇恐色溪訴不平聲落葉啼猿怨危枝宿鳥驚林  
疎風四面霜冷月三更酒醒愁無寐燒松炙到明

餞陳匝峰之廉泉

桃源渺何處夢短到家難不辨一丘費猶為九品官鶴

嫌新俸薄鷗訝舊盟寒附翼攀鱗事書生不敢干

俞琰

焦山寺夜坐偶作

夜宿焦山寺月明聞棹歌蜀江到吳盡海舶過淮多風  
浪翻龍窟霜林露鳥窠詩成忽有酒不飲欲如何

陳普

凭闌

高豁乾坤眼山青綠雨收夕陽流水遶荒草白雲浮柳

蔭小溪側樵歌古渡頭  
凭虛發清嘯安得仲宣樓

黃希旦

采藥

采藥山中去攀躋不覺賒  
深源無俗迹滿地是靈芽  
巖迴陰留雪溪澄淨見沙  
可憐名利客應笑此生涯

水心亭

為愛方池淨危亭此構新  
寒光搖玉鑑晴色戲金鱗  
月上驪宮曉蓮開水府春  
主人能息慮四座絕紅塵

秋夕登樓

高閣倚斜陽，登臨倍覺涼。  
殘蟬空自怨，歸燕為誰忙。  
蔽日雲頭猛，沿山雨脚長。  
竹村谿上景，髣髴似瀟湘。

晚眺

晚涼思遠眺，策杖出松林。  
車馬自來往，路歧橫古今。  
商飈未落葉，永巷已鳴砧。  
自笑眠雲客，因時感激深。

秋半

晚吹生叢竹，淒涼又半秋。  
年華驚倏忽，人事覺淹留。  
林

噪殘蟬急山光暮雨收  
登臨將眺望煙霧閉層樓

葛長庚

秋夜

有客眠孤館更闌擁紙衾  
清風千里夢明月一聲砧  
素壁秋燈暗紅爐夜火深  
寒猿啼嶺外惹起故鄉心

白雲菴

宿霧戀喬木落花粘瘦枝  
鳥聲人靜處山色雨來時  
霽月成相約涼風解見知  
僧房安一枕海氣濯冰肌

海豐道中

海近疑無地，山長儘有天。  
蛇岡嵐霧濕，魚市水風羶。  
苔色陪巖草，榕陰冒浦蓮。  
由來金翠盛，遮莫酌貪泉。

述懷

弔影自憐孤，消愁得酒壺。  
客悵迷曉夜，夢事付江湖。  
雨壁琴絃潤，風窗硯水枯。  
晚蟬知此意，為我噪高梧。

閩清醉中

東風正月二吹我，上梅溪白雪方纔散。  
黃鶯未見啼半

空萌雨意一蝶訪桃蹊醉卧黃三店夜深聞竹雞

順昌即事

筆下千機錦胸中一滴金乾坤春甕闊風月夜樓深世  
絕夫君操人誰梁父吟只尋雲外路誰復聽寒砧

即事寄紫元

老雨餞秋菊孤煙醞暮嵐雁驚十月北梅早一枝南往  
事風吹帽良宵月挂簷時哉亦難得我已到無參

五更解醒梅竹之間徘徊體



宿鳥能傳語殘風且點心山情憐淡坐月色笑孤斟  
我梅花睡聞他竹葉吟清歸無所得得句貴如金

博羅縣驛

虎嘯月生海猿啼風撼山夢回三鼓盡身自九天還雲  
氣浮窗外泉聲入枕間問心宜富貴為復要清閒

景泰晚眺

海岸孤絕處晴沙露遠汀潮花人鬢白山色佛頭青夕  
照雌黃筆秋煙水墨屏天空杉月冷鶴夢幾回醒

張道士鹿堂

清夢繞羅浮羽衣延我遊  
新茶尋雀舌獨芋煮鷓頭  
春鶴飲藥院夜猿啼石樓  
丹爐猶暖在聊為稚川留

有懷

紫綺輕裘穩青綾廣被長  
明珠懷夜月孤劔匣秋霜  
氣魄今諸葛襟期舊子房  
西風一長嘯草木正淒涼

十月十四夜

十月十四夜寒燈焰寸長  
披衣臨曲水把筆向清霜  
月

透詩情冷風吹醉面涼故人知得否空斷早梅腸

八月三日即事

煙冷渾沾水溪清可數魚鴉翻千點墨雁草數行書  
今日征帆下前年上國初詩盟寒復講無酒興何如

小桃源

好事開三徑栽花滿一園前頭平俯水裏面曲通村  
自有鳩夫婦仍多竹子孫醉歸迷去路題作小桃源

希書

懷廣南轉運陳學士

極望隨南斗迢迢思欲迷春分桂嶺外人在海門西殘  
日依山盡長天向水低遙知仙館夢夜夜怯猿啼

書惠崇師房

詩名在四方獨此寄閒房故域寒濤闊春城夜夢長禽  
聲沉遠木花影動回廊幾為分題客殷勤埽石牀

寄懷古

見說雕陰僻人煙半雜羌秋深邊日短風動曉笳長樹

勢分孤壘河流出遠荒遙知林下客吟苦夜禪忘

送嗣端東歸

遠念生泉石人中事欲銷卷衣城木落尋寺海山遙帆  
影迷寒雁經聲隱暮潮後期俱未定況我鬢先彫

送可倫赴廣南轉運凌使君見招

別語畏殘漏心懸瘴海邊回期無定日去路極遙天苦  
霧沉山郭寒沙漲隰田幾宵尋使府清話費閒眠

保暹

秋徑

杉竹清陰合，閒行意有憑。  
涼生初過雨，靜極忽歸蟲。  
迹穿幽穴苔痕接，斷稜翻思深處隱。  
峰頂下層層。

寄徐任

故鄉書久斷，寒夜起歸心。  
遠路秦關外，啼猿劔閣深。  
貧游年暗改，醉卧月空沉。  
幾夕疎林下，相思費靜吟。

早秋閒寄宇昭

窗虛枕簟明，微覺早涼生。  
深院無人語，長松滴雨聲。  
詩

來禪外得愁入靜中平遠念西林下相思合慰情

文兆

宿西山精舍

西山乘興宿靜稱寂寥心一境杉松老三更雨雪深草  
堂僧語息雲閣磬聲沉未遂長棲此雙峰曉共尋

送簡長師之洛

動靜非常態超然西去心水期經洛聽雲約到嵩吟齋  
訪煙村遠禪依竹寺深祇應風雅道相府是知音

行肇

郊居

靜室簾孤捲幽光墜露多  
徑寒杉影轉窗晚雪聲過  
茗味沙泉合爐香竹靄和  
遙懷起深夕舊寺隔滄波

送文光上人西游

高木墜殘霖關河入遠心  
蒿遊忘楚夢華近識秦音  
塔古懸圖認碑荒背燒尋  
幾思興替事獨上灞陵吟

酬贈夢真上人



禪舍因吟往晴來坐徹宵春通三徑晚家別九江遙巢  
重禽初宿窗明葉旋飄往期應未定謝守有詩招

簡長

晚次江陵

楚路接江陵倦行愁問程異鄉無舊識多難足離情落  
日懸秋樹寒蕪上廢城前山不可望斷續暮猿聲

書行肇師壁

禪徑秋苔合寒窗帶雨痕心真冥自契句好與誰論露

冷蛩聲咽風微葉影翻  
白雲如有意終日在前軒

送僧南歸

漸老念鄉國先歸獨羨君  
吳山全接漢江樹半藏雲  
振錫林煙斷添餅澗月分  
重樓上方定孤梵雪中聞

送行禪師

南國山重疊歸心向石門  
寄禪依鳥道絕食過漁村  
楚雪黏餅凍江沙濺衲昏  
白雲深隱處枕上海潮翻

惟鳳

寄希書

閒中吟鬢改多事已心違客路逢人少家書入闕稀秋  
聲落晚木夜魄透寒衣幾想林間社他年許共歸

送陳豸處士

草長關路微離思更依依家遠知琴在時清買劍歸孤  
城回短角獨樹隔殘暉別有鄰漁約相迎埽釣磯

送史館李學士任和州

歷陽南望極岸遠石城危去夢驚潮斷行吟見雁隨淮

帆向風闊楚水落秋遲到日應閒卧公心帝自知

寄登封宰韓殿丞

前秋登閣晚吟次見晴雲中嶽聳當縣三年靜若君朱  
衣借客典清俸買書分別後逢搖落相思隔晉汾

與行肇師宿山棲賢寺

冰瀑寒侵室圍爐靜話長詩心全大雅祖意會諸方磬  
斷危杉月燈殘古塔霜無眠向遙夕又約去衡陽

惠崇

同寇萊公探得池鷺分明字韻

雨歇芳塘溢，遲回不復驚。  
暴翎沙日暖，引步島風清。  
照水千尋迴，棲烟一點明。  
主人池上鳳，見爾憶蓬瀛。

訪楊雲卿淮上別墅

地近得頻到，相攜向野亭。  
河分岡勢斷，春入燒痕青。  
望久人收釣，吟餘鶴振翎。  
不愁歸路晚，明月上前汀。

贈文兆

偶依京寺住，誰復得相尋。  
獨鶴窺朝講，鄰僧聽夜琴。  
注

餅沙井遠鳴磬雪房深久與松蘿別空懸王屋心

字昭

曉發山居

蓐食小人家寒燈碎落花雞鳴窗半曉路暗月西斜世  
故欺懷抱風霜老歲華劇憐詩思苦悽惻向長沙

贈魏野

別業惟栽竹多閒亦好奇試泉尋寺遠買鶴到家遲藥  
就全遺母詩高祇教兒未能終住此共有海山期

寄保暹師

吟會失秋期荒山寄病時  
客髭生白早叢木落青遲  
渴  
猗窺莎井陰蟲占菊籬  
歸心何以見霜月下天涯

幽居即事

埽苔人迹外漸老喜深藏  
路僻閒行遠春晴晝睡長  
餘  
花留暮蝶幽草戀殘陽  
盡日空林下孤禪念石霜

夕陽

向夕江天迴微微接水平  
帶帆歸極浦隨客上荒城  
雲

外僧看落山西鳥過明何人對幽怨萋萋敗莎并

寄題武當郡守吏隱亭

郡亭傳吏隱閒自使君心卷幔知來客懸燈見宿禽  
茶煙逢石斷棋響入花深會逐南帆便乘秋寄此吟

懷古

原上秋草

秋來深徑裏老病眼慵開戶外行人絕林間朔吹回  
亂蛩鳴古塹殘日照荒臺惟有他山約相親入望來



寺居寄簡長

雪苑東山寺山深少往還紅塵無夢想白日自安閒杖履苔痕上香燈樹影間何須更飛錫歸隱沃洲山

遵式

酬伉上人

高卧清閒極誰能更似君山光晴後見瀑響夜深聞拾句書幽石收茶踏亂雲江頭待無事終學棄人羣

贈智輪弟

溪竹擁書簾，溪雲冷不厭。  
千巖惟虎伴，一講許詩兼。  
煮茗敲冰柱，看經就雪簷。  
有時開靜戶，寒日下峰尖。

秘演

山中

結茅臨水石，淡寂益閒吟。  
久雨寒蟬少，空山落葉深。  
危樓乘月上，遠寺聽鐘尋。  
昨得江山信，期來此息心。

贊寧

居天柱山

四野豁家庭柴門夜不扃水邊成半偈月下殘經雖  
逐諸塵轉終歸一念醒未知斯旨者萬役盡勞形

智圓

贈聞聰師

澹然塵慮絕禪外苦風騷性覺眠雲僻名因背俗高冰  
煙蒸紙帳寒髮澀銅刀幾宿秋江寺閒吟聽夜濤

則之

早梅

數萼初含雪孤情畫本難有香終是別雖瘦亦勝寒橫  
笛和愁聽斜枝倚病看朔風如解意容易莫吹殘

契嵩

羣賢宿山賦得暮雲崑下宿

微風靜林杪紅日下巖阿明月出已滿白雲歸未多高  
應伴猿鶴深不暗松蘿若弗為霖去其如旱歲何

浙江晚望

暮色看無際秋空水混天片帆飛鳥外新月落潮邊隔

越山形小吞吳地勢偏幾人來往老早晚渡頭船

題徑山寺

翠拔羣山外連天勢未休雲迷飛鳥道雨出古龍湫僧  
在深雲定香和杳靄浮人間游不到臺殿自清秋

郎侍郎致仕

平時獨高謝道勝欲韜光白髮辭明主青山戀故鄉藥  
畦容鶴到吟徑恐雲藏更愛禪林卧時來拂石牀

汎若耶溪

越水乘春汎船窗掩又開好山沿岸去驟雨落花來岸  
影樵人渡歌聲浣女回滄浪無限意日暮更悠哉

書毛國章園亭

愛此園林好重來花木滋游人醉不去幽鳥語無時煙  
郭連芳草春湖泛淥池松篁非俗韻游子漫相期

山中早行

前山經夜雨獨往步春泥天岸日將出田家雞更啼孤  
煙行處起曠野望中低猶喜逢樵客相將過數溪

寄懷泐潭山月禪師

聞道安禪處深蘿杳隔溪清猿定中發幽鳥坐邊棲雲  
影朝晡別山峰遠近齊不知誰問法雪夜大江西

送客還北闕道中作

北郭送楊子日斜歸舊居路泥侵曉潤晦月逼春餘桑  
柘雨中綠人煙闕外疎依然見風俗歸興混樵漁

次韻無訾赴承天再命

載命還高讓知君所趣深青山當隱處白髮欲棲心更

俟逢梅雨何妨過虎林潺湲合澗水六月足清音

同賦聞泉

歲宴林間宿初聞况夜晴漱寒醒客夢飛響應山鳴深澗松風靜幽人石室清誰人能為我寫此入琴聲

歲暮還西塢寄公濟無言

乘興溪邊去仍從林下歸梅香帶春信日色暖人衣白髮思還遠清流遇更稀野禽寧會意相顧向柴扉

惟晤



同賦聞泉

澗泉吾所好山舍寂無喧  
春脈生雲底夜聲驚梵痕  
風休不動竹月上未啼猿  
石瀨鳴逾急冷然清夢魂

次韻奉和仲靈歲暮還西塢見寄

白髮東山老青林西塢歸  
聽猿時駐錫厲水自褰衣  
高論才難敵孤蹤行亦稀  
慚君寄樵採佳句出巖扉

詒元

次韻奉酬仲靈歲暮還西塢見寄

野步溪流靜源深興未歸晚禽棲雪竹殘霞灑禪衣放  
意天涯遠狂吟人落稀詩成寄我侶清氣動林扉

真淨

寄無為居士

世俗事無盡養高心自閒蔬園通綠野林塢帶青山丹  
竈忘添火雲菴懶著關別應修省術七十見朱顏

送人之南嶽

境幽南嶽寺路向碧巖分遠近松相接高低鐘共聞靈

禽時奏樂香石日籠雲想到經行處超然趣不羣

道潛

和龍直夫秘校細雨

細雨連阡陌輕雲濕不飛池寒鷗自卧巢冷燕催歸慘  
澹疑沉樹飄蕭忽近幃簷花霑已久稍欲墮人衣

薄霧兼寒雨凌晨靄未分細宜池上見清愛竹邊聞斗  
帳侵蘭夢虛櫺逼蕙薰晚來欣小霽鈎箔見疎雲

傍砌飄纒斷從風強更來斑斑泣蛛網浥浥汗江梅薄

日光時漏層陰意未開  
少陵心易感詩句寫清哀

田居四時

原隰春風暖池塘雁北翔  
曉耕雲塢潤午飯野芹香  
燕子依茅棟花枝過土牆  
東阡與南陌生事日皇皇

五月梅爭熟村村桑柘稀  
茜裙蠶婦瘦粉翅乳鷺肥  
菱蔓滋溪雨藤花鎖釣磯  
呼兒行採去亭午候荆扉

刈獲終吾事田園日向閒  
晚香增橘袖潦水耗汀灣  
聚噪棲鴉定孤吹牧豎還  
兒童驚野燒一片起前山

汨汨防農務窮冬亦謾勞  
茆簷催日午籬落聽雞號  
臘近還移竹宵閒更索絢  
春風歸早晚行見事東臯

次韻太虛夜坐

古寺冬蕭瑟天寒色更冥  
捲幃延素月轉盼失流星  
爐底眠枯枿窗根立凍餅  
談餘焚柏子一穉小煙青

再遊鶴林寺

招隱山南寺重來歲已寒  
風林驚墜雪雨澗咽飛湍  
壁暗詩千首霜清竹萬竿  
東軒謫仙句洗眼共君看

惠洪

西齋晝卧

餘生已無累古寺寄閒房  
睡足無來客窗空又夕陽  
叢蕉高出屋病葉偶飄廊  
起探風簷立飛蚊鬧晚涼

清明前一日聞杜宇示清道芬

籬外花如海閒軒小寢驚  
最先聞杜宇更覺近清明  
雲怒必為雨風和拗得晴  
阿芬甘劣我笑裏却詩成

次韻衡山道中

嶽色墮馬首嵐光忽滿襟  
眼寒知意適句苦覺愁侵  
沃野獻新綠殘晴釀晚陰  
天涯驚去雁料理欲歸心

興闌

春晚忽凭檻滿眸佳景來  
鴨頭波蕩漾螺髻色崔嵬  
苔嫩錢無數花殘錦作堆  
一甌雙井釀何必酒盈杯

與海兄

春寒真料峭久客厭江城  
雲重欲為雨風和尚未晴  
意隨飛鳥去事逐亂埃輕  
畢竟閒居好煩君念此情

甲辰十一月十二日往湘陰馬上和季長見寄

小春二首

錄一首

風埃九十里霧雨濕馳裘雁過回詩眼江寒聚晚愁  
魂清方怯雪句冷更含秋殘岸連孤嶼依稀似橘洲

早行

失枕驚先起人家半夢中聞雞憑早晏看斗辨西東  
纒濕知行露衣單怯曉風秋陽弄光影忽吐半林紅

如璧



九日發淮康

九日非吾事黃花亦謾生未傾彭澤酒還背汝陽城細  
雨秋天近西風白葛輕山村遠城市可有笑歌聲

善權

寄致虛兄

避寇經重險懷君屢陟岡空餘接浙飯無復宿春糧衣  
袂饒霜露柴荆足虎狼春來何所恨棣萼正含芳

元肇

徑山

東西兩徑幽歲晚得同遊  
壑霽陰猶在溪雲凍不浮  
鳥驚樵斧重猿挂樹枝柔  
怕有梅花發因行到水頭

居簡

贈浩律師

浩也昆尼學精於玉帳  
嚴蟻酣停埽砌燕乳記  
鈎簾茶鼎敲冰煮花壺  
漉水添夢回池草綠忍  
踐綠纖纖

善珍

山行晚歸

藥徑入雲林晚晴扶杖吟  
照泥星復雨經朔月猶陰  
樹折憐巢覆泉清見葉沉  
愛閒自如此不是學灰心

春寒

松間燈夕過顧影在天涯  
雪暝迷歸鶴春寒誤早花  
艱難知世味貧病厭年華  
故國風塵外無人可問家

斯植

登雲漢閣

高閣勢凌虛天涯入望微雲藏山鳥影春滿野人衣積  
雨催花盡寒樵背日歸焚香端坐處似覺世塵稀

送覺上人

送君千里去又見落花飛水國今宵別天涯隔歲歸岸  
多春樹密灘小夕陽微後夜扁舟月應逢宿鳥稀

思歸感興

久客空江上閒吟對石門青山非遠近流水自朝昏夜  
月添鄉夢春風入燒痕翻思南郭路迢遞隔煙村

多福寺

野鹿自成羣山中少隱君  
鐘聲兩寺合人語一溪分  
泉響松間雨苔生石上紋  
多年僧住此半榻鏤閒雲

吳中即事

世事交情淺傷心獨倚欄  
海雲經雨重秦樹入秋殘  
潮落吳天遠風生夢澤寒  
英雄千古地回首是長安

宿雲山房

縹緲沉虛碧清池見宿雲  
松聲臨石斷山影與泉分  
芳

草經年夢幽禽隔境聞倚闌吟未盡紅日又將曛  
送敏上人歸永嘉

風光苦變遷客裏對殘年別我此時路問鄉何處船斷  
雲連雨雪落日遠人煙又向龍湫畔開扉近瀑泉

對梅寄人

欲問江梅信吟筇帶晚霞笑看今日樹開遍幾年花疎  
影生來瘦寒枝折處斜要教人寄遠何地是吾家

題天竺巖棲山房

一室寄雲隈，凭闌日幾回。  
無風山自雨，有主燕還來。  
野徑通樵遠，崑花向晚開。  
舊時題數壁，今已半蒼苔。

送隱士游京淮

送君湖柳下，未別已關情。  
古塞去程遠，寒江入夢清。  
野雲低水樹，山雨閉春城。  
到處逢知己，虛傳隱姓名。

遣懷

愁極鬢成絲，滄江夢未歸。  
烏啼山雨急，春盡故人稀。  
曉潤侵吟壁，寒雲繞竹扉。  
向來詩滿東，應是與心違。

永頤

山村日暮

犢背斜陽暖茅茨石樹穿行人識岡路飢鵲噪沙田遠  
浦生微月荒臯起暝煙羣鳥飛散盡寒水漾漁船

汀漲

澤國迷春漲芳洲生綠波靜涵汀樹小閒占浦雲多風  
晚低輕燕川明媚浴鴛望人煙思遠奈此暮山何

往龍岫舟中



龍山溪上路短棹臘中行雪霽寒郊濶春回宿霧生柳  
搖水綫斷鷺起玉衣明未見晴梅發先思杖屨輕

潭上

落葉寒潭上秋風釣艇閒片雲移晚渡孤浪兀晴山敗  
樹寒蕪擁高楓夕照還一鷗飛起處煙靄暮溪灣

春日泛舟

野外苔磯好孤舟未可拋碧溪沿谷口晴柳護塘坳波  
靜魚吹沫林深鵲隱巢輕雲障暖日閒思渺春郊

自南

廣潤寺新寮

客不赴齋招冥心坐寂寥青山若厭看白日也難消鷺  
起衝荷葉蟲行蝕菊苗何年稱老宿來往此閒寮

可士

送禪友

一鉢即生涯隨緣度歲華是山皆有寺何處不為家笠  
重吳天雪鞋輕楚地花他年訪禪室寧憚路岐賒

道諫

遊靈隱寺

長吟遊古寺九里入青松  
鳥向花間語僧從月下逢  
陰廊連碧殿清磬雜疎鐘  
回首夕陽晚煙霞鎖亂峰

惠巖

正覺寺

野水痕俱落挈舟日未西  
斷溝橫畧約支徑入招提  
方廣源深似竹林境可齊  
徘徊未能返暝色起前溪

昭儀王清惠

李陵臺和水雲韻

李陵臺上望  
答子五言詩  
客路三千里  
鄉心十二時  
孟勞欣已釋  
區脫未相離  
忽報江南使  
新來貢荔枝

李清照

皇帝閣春帖子詞

日月堯天大  
璿璣舜歷長  
或聞行殿帳  
多是尚書囊  
莫試黃金簾  
新除玉局牀  
春風送庭燎  
不復用沉香

朱淑真

傷春

閣淚拋詩卷無聊酒獨親  
客情方惜別心事已傷春  
柳暗輕籠日花飛半掩塵  
鶯聲鶯蝶夢喚起舊愁新

春日感懷

寂寂多愁客傷春二月中  
惜花嫌夜雨多病怯東風  
不奈鶯聲碎那堪蝶夢空  
海棠方睡足簾影日融融

墨梅

若箇龍眠手能傳處士詩借他窗上影寫作雪中枝頃  
刻回春色輕盈動玉卮不能殷七七橫笛月中吹

春日有作

景近清明節垂楊翠縷長塞鴻歸朔漠海燕度瀟湘花  
麗繁爭錦鶯嬌巧轉簧西園正明媚收拾入吟鄉

遊湖歸晚

戀戀西湖景山頭帶夕陽歸禽翻竹露落果響芹塘葉  
倚風中靜魚遊水底涼半亭明月色荷氣惱人香

秋日晚望

極目寒郊外晚來微雨收隴頭霞散綺天際月懸鈎一  
字新鴻度千聲落葉秋倚闌堪聽處玉笛在漁舟

早秋偶筆

蕭蕭涼風至淒然景驟清雨餘殘暑退日落晚涼生鷹  
隼雙睛轉梧桐一葉驚試聽松竹裏萬籟起秋聲

秋夜感懷

滿院含秋思蟾輝映一方吟蛩喧曲砌宿雨傍回塘木

落桐應瘦宵寒漏正長安仁閒感慨徒爾髣蒼蒼

林杜孃

遊碧沼勝居

幽谷泉聲冷鳥啼僧定深好花叢古砌寒瀑發高岑游  
客陸鴻漸居人支道林欲歸青嶂去臨去復沉吟

王元妻黃氏

聽琴詩

拂琴閒素匣何事獨顰眉古調俗不樂正聲公自知寒



泉出澗澀老檜倚風悲縱有來聽者誰堪繼子期

賈蓬萊

閨怨

露顆珠團團冰肌玉釧寒杏梁棲雙燕菱鏡掩孤鸞殘  
樹枯黃遍圓荷濕翠乾繡簾生畫色窗下帶羞看

春曉

方池水影薄曲檻烏聲嬌鸞鏡紅綿冷蛾眉翠黛消冶  
容舒嫩萼幽思結柔條纖指收花露輕將雪粉調

靈犀夫人

中秋

高秋渾似水萬里正圓明  
玉兔步虛碧冰輪碾太清  
廣寒宮有路桂子落無聲  
吾館無絃彈棲鳥莫要驚

仙村人

春日田園雜興

芳草東郊外疎籬野老家  
平疇三尺水小圃百般花  
青箬閒耕雨紅裙鬪采茶  
村村寒食近插柳遍檐牙

柳州

春日田園雜興

東風生意鬧農圃正宜勤  
稻種開包曬菊苗依譜分  
疇西曉耕雨舍北暮鋤雲  
莫待荒三徑歸與陶令君

溫婉

述懷寄人

分手長亭後音書更杳聞  
離愁應似我况味不如君  
玉管寧無恨蘭蓀別有薰  
攀思共明月心緒正紛紛

欽定四庫全書

御選宋詩

御選宋詩卷四十四

謹案卷四十三第五頁後五行雪晴汎湖刊本雪  
訛雲據竹莊小藁改

第三十五頁後八行山陰道中呈鄭正樸翁刊本  
呈訛吳據晞髮集改

第四十二頁後三行風雨憶吾廬刊本吾訛無今  
改

卷四十四第十六頁後六行誰能更似君刊本君  
訛名今改





總校官庶吉士臣侍朝

校對官檢討臣蕭九成

謄錄舉人臣李駟



欽定四庫全書薈要

集部

御選宋詩卷四十五



詳校官原任主事<sub>臣</sub>李斯咏

欽定四庫全書薈要卷一萬八千三百五十二

集部

御選宋詩卷四十五

七言律詩一

李昉

禁林春直

疎林搖曳日輝輝  
直閣深嚴半掩扉  
一院有花春晝永  
八方無事詔書稀  
樹頭百轉鶯鶯語  
梁上新來燕燕飛  
豈合此身居此地  
妨賢尸祿自知非



楊徽之

寒食日寄鄭起侍郎

清明時節出郊原  
寂寂山城柳映門  
水隔淡煙疎竹寺  
路經細雨落花村  
天寒酒薄難成醉  
地迴樓高易斷魂  
回首故山千里外  
別離心緒向誰言

贈譚先生

古觀重重繞翠微  
杉松深處掩雙扉  
雲生萬壑投龍去  
海隔三山放鶴歸  
花洞宴遊春日永  
石壇朝禮曙星稀

每聽高論長生理擬向塵中便拂衣

曹翰

內宴應制

三十年前學六韜英名常得預時髦  
曾因國難披金甲不為家貧賣寶刀  
臂健尚嫌弓力軟眼明猶識陣雲高  
庭前昨夜秋風起羞見團花舊戰袍

李九齡

贈馬道士

水共逍遙雲共孤  
混時言笑只佯愚  
經年但醉宜城酒  
千里唯擔華嶽圖  
尋野鶴來空碧洞  
覓琴僧去度重湖  
人間再見知何日  
乞取先生古轆轤

柳開

楚南樓

洗盡蠻煙几案空  
登臨直見楚山雄  
坐當鴻鵠高飛處  
身在乾坤灝氣中  
木落有情瞻北闕  
霜輕無夢入西風  
凭欄自是蓬瀛客  
獨對瀟湘興未窮

徐鉉

和清源太保寄湖州潘郎中

老大離羣一倍愁，谿山風物且淹留。  
醞成春酒誰斟酌，抄得新書自校讐。  
莫似牧之矜曠達，須教子重讓風流。  
恩門舊分知難忘，題取新詩上郡樓。

和錢秘監與邊

筵上詩題共筆牀，樽前酒興話高陽。  
心清自覺官曹簡，院靜先知節候涼。  
南國少年推貴重，東堂前輩讓賢良。

好看雙鳳追飛處胡粉新塗紫界牆

送周郎中還司

憶在廬山始識君當時惟擬共眠雲那知身計關前定  
却向人間逐世紛紫閣峰前欣欲往銀臺門裏歎離羣  
青囊舊有登真訣莫遣閑人取次聞

舒雅

答錢少卿

蓬萊閣下舊鄰居偶別俄驚四載餘每見寒葭思倚玉

忽臨秋水得雙魚  
人間貴盛誰能及  
物外優閒我自如  
聞認歸艎向春渚  
深知不與道情疎

刁衍

代意

蕙時芳夕九迴腸  
歛袂東窗待曉光  
秦嶺樹高迷隴塞  
楚天雲淡隔瀟湘  
病餘公幹情多詠  
秋晚安仁鬢有霜  
休道鮫人落珠淚  
微波還擬託陳王

陳搏



偶題

十年蹤跡走紅塵回首青山入夢頻  
紫陌縱榮爭及睡朱門雖貴不如貧  
愁聞劔戟扶危運悶見笙歌聒醉人  
攜取舊書歸舊隱野花啼鳥一般春

田錫

花雨

雨裏飛花片片紅雨微花亂轉溟濛  
川原何處連天草簾幕無人半日風  
寂莫劉楨新病後淒迷莊舄苦吟中

可堪更是黃昏景  
燕冷鶯寒恨想同

憶梅花

三年不見遠江梅  
長到梅時把酒杯  
似共故人千里別  
空思近臘數枝開  
心隨曉月經鄉渚  
夢與春雲傍釣臺  
金蕊瓊花風雪景  
憑誰圖畫入關來

和太素春晝

風幡輕細翠悠颺  
樓閣春寒水滿塘  
柳絮微煙吟思足  
梨花朧月睡魂香  
江山似畫憐湘浦  
魚筍常新憶華陽

早是春陰已無賴，  
可堪中酒惡情腸。

紅樹

秋來佳樹色堪攀，  
紅葉沿溪復映山。  
半露寺樓深掩裏，  
密籠漁舍夕陽間。  
吟看搖落堆金井，  
醉賞扶疎對玉顏。  
水國却疑春野秀，  
似花幽鳥正關關。

秋夜有懷寄副翰宋白舍人

秋風蕭瑟北山椒，  
賴有琴樽遣寂寥。  
書幌靜憐斜月墜，  
窗燈寒帶落花挑。  
久辭知己來江國，  
少寄音書過海潮。

因憶玉堂今夜直建章宮漏正迢迢

暇日偶題

年來吟鬢已星星烏石溪邊葉又零  
簾下孤燈刪草奏  
窗前疊嶂讀茶經瘴鄉怕襲山嵐毒  
野艇嫌衝水霧腥  
天末豈忘歸去意白雲掩映數峰青

郡中遣意寄友人

溪雲澹澹浪悠悠十二州中最小州  
花落喜過流水寺  
月明懶下看潮樓藥欄梅潤秋重換  
碁局松陰夜不收

吟寄故人如借問釣魚磯在海西頭

題天竺寺

三月楊花撲馬飛  
聯鑣來款白雲扉  
湖邊鐘磬含清籟  
樹杪樓臺靄翠微  
野景留人狂欲住  
春光啼鳥勸思歸  
萋萋芳草重回首  
十里松門照落暉

寇準

應制賦牡丹花

栽培終得近天家  
獨有芳名出衆花  
香遞暖風飄御座

葉籠輕靄襯明霞縱吟宜把紅箋擘留賞惟張翠幄遮  
深覺侍臣千載幸許隨仙仗看穠華

春晚書事

春盡江天景寂寥思鄉還共楚雲遙林花經雨香猶在  
堤柳無風絮自飄水國獨慚臨縣邑煙郊爭合負漁樵  
青梅時節遲歸計且逐餘芳殢酒瓢

秋日

江天物候潛哀變氣爽初疑夏景餘雨漬亂苔侵古壁

風飄紅葉滿荒渠  
晚雲連嶽幽藏寺  
秋水澄江靜見魚  
昔歲一鳴無所恨  
綠槐金蕊任蕭疎

初到長安書懷

洊承丹詔撫彫殘  
適值年豐萬井安  
舊職尚兼黃閣貴  
前驅新擁碧油寒  
淨憐風竹經宵聽  
老愛山雲盡日看  
魂夢不知關塞外  
有時還得到金鑾

秋夜懷歸

渭水苔磯阻舊遊  
夢回空館却凝愁  
一聲江笛巴雲暝

半夜山風楚樹秋  
星落古池孤影動  
燈搖疎壁冷光幽  
遲明不寐空搔首  
蹤跡何由得狎鷗

洛陽有懷岐山舊遊

綠鬢年來已漸彫  
舊遊芳草路迢迢  
山橫遠翠疑歌黛  
柳拂輕梢認舞腰  
秦甸夢回空有恨  
洛陽吟斷獨無憐  
斜陽更上高樓望  
始覺離情一倍饒

江上晚行

秦川不得却歸耕  
奉詔年來在楚城  
孤寺殘鐘催夕照



汀洲疎葦送秋聲  
西風獨起湖山思  
久客應知寂寞情  
野鶴漸無驚弋意  
對人孤立水煙平

春日閒望有感

水鄉春氣變新正  
風物光榮異帝城  
閒步偶尋芳草色  
空林獨聽野鶯聲  
煙霞未得從幽興  
吟賞潛悲減舊情  
燕麥楊花自搖蕩  
不知離客困南征

鄴中和崔邁著作

獨倚空樓畏景殘  
凝眸魂斷楚雲端  
猿清好雜江聲聽

山遠宜和霽色看鳥掠平蕪堪入畫風來危檻欲生寒  
蕭蕭前浦歸帆靜落日長吟且凭欄

已東寒食

春雨蕭蕭寒食天遠行猶在楚江邊人思故國迷殘照  
鳥隔深花語斷煙薄宦未能酬壯節良時空自感流年  
因循未學陶潛興長見孤雲倍黯然

過霧山

青燈古殿枕寒溪門外天垂斗柄低啼鳥不知春向背

落花依舊水東西半橋霜月光相照一帶松煙色未齊  
誰料百年榛莽地香雲今日繞輪蹄

李維

休沐端居有懷希聖

銀闕琳房視草餘龍門岑寂斷軒車彩毫閒試金壺墨  
青案時看玉字書王令風流希謝傅子雲詞賦敵相如  
瓊枝不見蕭齋晚蕙草煙微度綺疏

直夜

繚垣堯闕慶雲深  
畫燭熏爐對擁衾  
三殿夜籤傳漏箭  
九秋霜籟入風琴  
階前槁葉驚寒雨  
天際孤鴻答迴砧  
敲枕便成魚鳥夢  
豈知名路有機心

寄田錫舍人

當年心計此心知  
忽忽逢人亦自疑  
枉是憂公生白髮  
有何長略謝清時  
林僧已怪抽身晚  
朝侶猶嫌到闕遲  
多喜通規識幽抱  
路遙無處寄相思

歸越東舊隱留別秦中知己

客亭楊柳葉初殘  
歌咽秋空慘別顏  
吟愛好峰歸越路  
醉衝寒雨出秦關  
煙蘿庭戶重棲倚  
漁浦人家舊往還  
縱使功名無分得  
免教心在怨尤間

再會傅逸人

分到知心意不輕  
幾年曾是愴離情  
微風吹雨鴈初下  
落葉滿階蟲正鳴  
燈靜苦嫌論劍畧  
簟涼頻喜轉琴聲  
從來共約雲泉老  
肯向人間占好名

貽傅逸人

少年名節動人羣，避俗身居積水濱。  
幾為典衣留遠客，半來敲枕看閑雲。  
門連酒舍青苔滑，路近沙汀白鳥分。  
誰道無情活黎庶，數篇新製詠南薰。

郊居寄朝中知己

年來流水壞平田，客徑窮愁自可憐。  
汀葦亂搖寒夜雨，沙鷗閒弄夕陽天。  
狂嫌濁酒難成醉，冷笑清詩不直錢。  
碧落故人知我否，幾回相憶上漁船。

王旦

十洲閣

山川如幻閣長秋一島飛來伴九洲不礙漁樵雙槳過  
何妨羅綺四時遊雲疑秦華分張去水憶蓬瀛散漫浮  
禁苑未知湖海樂生綃寫取獻中州

王禹偁

寄魚臺主簿傅翱

聽說魚臺景最奇鮑參軍到語多時天晴綠野懸漁網  
木脫空城露酒旗錦擲鮮鱗紅潑刺雪翻寒鷺白襪襪

仍誇縣尹風騷客應有秋來唱和詩

遊虎丘山寺

寺墻圍著碧孱顏曾是當年海湧山盡把好峰藏院裏  
不教幽景落人間劔池草色經冬在石座苔花自古斑  
珍重晉朝吾祖宅一回來此便忘還

寄獻潤州趙舍人二首

南徐城古樹蒼蒼衙府樓臺盡枕江甘露鐘聲清醉榻  
海門山色滴吟窗直廬久負題紅藥出鎮何妨擁碧幢



聞說秋來自高尚道裝  
筇竹鶴成雙

記言彩筆罷攜華卧閣  
高閒似道家  
琴院坐聽江寺磬  
郡樓吟見海山霞  
春園遺母親燒筍  
夜榻留僧自煮茶  
應笑陶潛未歸去  
折腰奔走在泥沙

春晚遊太和宮

數里新萍夾岸莎  
春來乘興宿煙蘿  
隨風蝴蝶顛狂甚  
當路花枝採折多  
絳節參差抽苦筍  
翠鈿狼籍撒圓荷  
湖山滿眼不歸去  
空羨漁翁雨一蓑

再汎吳江

二年為吏住江濱  
重到江頭照病身  
滿眼碧波輸野鳥  
一蓑疎雨屬漁人  
隨船曉月孤輪白  
入座晴山數點春  
張翰精靈還笑我  
綠袍依舊惹埃塵

贈湖州張從事

前年春榜亞龍頭  
詞賦曾推第一流  
上直未歸紅藥院  
供吟先得白蘋洲  
酒醒野寺烹山蕨  
公退溪亭狎海鷗  
自是吳門折腰吏  
滿衣塵土為君羞

和郡僚題李中舍公署

樹影池光映曉霞  
綠楊陰下吏排衙  
閒拖屐齒妨橫筍  
靜拂琴牀有落花  
地脈暗分吳苑水  
廚煙時煮洞庭茶  
青宮詞客多閒暇  
按曲飛觴待歲華

題張處士溪居

雲裏寒溪竹裏橋  
野人居處絕塵囂  
病來芳草生漁艇  
睡起殘花落酒瓢  
閒把道書尋晚迳  
靜攜茶鼎洗春潮  
長洲嬾吏頻過此  
為愛盤飧有藥苗

送馬學士入蜀

錦川宜共少年期四十風情去未遲  
蠶市夜歌敲枕處峨眉春雪倚樓時  
休誇上直吟紅藥多羨乘輅聽子規  
莫學當初杜工部因循不賦海棠詩

和陳州田舍人留別

演綸多暇每封章暫去頒條道更光  
郡吏好排紅粉妓使君曾是紫薇郎  
樓臺有月新詩出囹圄無人綠草長  
地接清淮足佳致水村煙塢似魚鄉

回襄陽周奉禮同年因題紙尾

武關西畔路巉巖  
兩月勞君寄兩緘  
鏡裏想添新白髮  
篋中猶貯舊青衫  
扶頭酒好無辭醉  
縮項魚多且放饒  
譬似元和張太祝  
十年不改舊官銜

寒食

今年寒食在商山  
山裏風光亦可憐  
稚子就花拈蛺蝶  
人家依樹繫鞦韆  
郊原曉綠初經雨  
巷陌春陰乍禁煙  
副使官閒莫惆悵  
酒資猶有撰碑錢

南郊大禮詩十首 錄三首

聖君重卜祀南郊  
仗擁黃麾間白旄  
仙吹冷翻蒼玉珮  
曉霞晴透絳紗袍  
天開兜率齋宮靜  
海湧蓬萊帳殿高  
遷客生還知有望  
商山不敢擬離騷

巖裡禮過一陽生  
抃賀歡呼動四溟  
聖壽久長南至日  
寶圖高大北辰星  
九重城闕天將曙  
百萬人家戶不扃  
知有化工無棄物  
海波分納一浮萍

千官雲擁御樓時  
朝服紛紛換禮衣  
萬里梯航歸大國

一聲雷雨破園扉青蠅傳去人人喜丹鳳銜來處處飛  
收盡洛陽遷客淚全家潛望日邊歸

新秋即事

宦途流落似長沙賴有詩情遣歲華吟弄淺波臨釣渚  
醉披殘照入僧家石挨苦竹旁抽筍雨打戎葵卧放花  
安得君恩許歸去東陵閒種一園瓜

村行

馬穿山徑菊初黃信馬悠悠野興長萬壑有聲含晚籟

數峰無語立斜陽  
棠梨葉落胭脂色  
蕎麥花開白雪香  
何事吟餘忽惆悵  
村橋原樹似吾鄉

寄豐陽喻長官

七十年華鬢未霜  
道情偏稱宰豐陽  
旦衙請印無仇覽

豐陽戶不滿  
千例省主簿

夜榻圍碁祇孟光

喻好碁與  
內子敵手

庭戶萬重嵐

氣盛盤餐數釘藥  
苗香猶言彭澤終  
歸去門柳青青檻  
菊黃

喜雪貽仲咸



半冬無雪嬾吟詩，薄暮紛紛喜可知。  
衣上惹來看不足，竹邊聽處立多時。  
光迷曙色侵窗早，片舞寒空到地遲。  
今日使君吟望好，一車飛絮醉褰帷。

霽後望山中春雪

誰種離離碎玉苗，曉樓吟望興偏饒。  
白雲作伴宜長在，紅日無情已半銷。  
聚映早霞明野寺，散隨春水過溪橋。  
世間安得王摩詰，醉展霜縑把筆描。

春郊寓目

百舌嬌慵未苦啼，雪隨春水下松溪。  
何人樵樹和雲斫，幾處山田帶雨犁。  
蜀柳半開鸚鵡眼，海棠深結麝香臍。  
東風似待閒人出，一路青莎襯馬蹄。

春郊獨步

襟袖飄飄晚吹輕，孤吟何必共人行。  
綠楊繫馬尋芳逕，春草隨人上古城。  
不分黃鸝誇巧舌，多慚戴勝勸歸耕。  
凭高朗詠沈湘賦，自許吾生似賈生。

偶圃小園因題二首

錄一首

偶營菜圃為盤飧淮瀆祠前水北村泉響靜連衙鼓響  
柴門深近子城門濛濛細雨春蔬甲疊疊寒流老樹根  
從此商於地圖上畫工添箇舍人園

寄潘處士

賣藥先生白布衣書來方信在京師減君爐裏燒丹術  
助我山中買酒資閑似野雲終不住閑如籠鶴已多時  
飄飄又去黃河北更負中條幾首詩

贈衛尉宋卿二十二丈

前翰長  
侍郎

謫宦歸來髮更斑，迴翔猶在寺卿閒。  
幾多僚友三台上，大半生徒兩制間。  
舊賜錦袍多貫酒，新裁紗帽欲歸山。  
東垣小諫龍鍾甚，空媿洪爐早鑄顏。

幕次閒吟

文章曾受帝褒稱，幕次孤吟冷似冰。  
借馬趨朝常後到，問人求米盡難憑。  
僮教罷藥朝無酒，兒廢看書夜絕燈。  
除却金章在腰下，其餘滋味一如僧。

江籬吟盡鬢成霜，謫宦歸來夢一場。  
每日祇窺丹鳳案，

被人猶喚紫微郎  
齋宮獨坐風翻幕  
客舍閒吟葉滿牀  
若是承明容再入  
未曾荒廢舊文章

今冬

休思官職落青雲  
且算今冬養病身  
白紙糊窗堪聽雪  
紅爐著火別藏春  
旋籛官醞漂浮蟻  
時取溪魚削白鱗  
况是豐年公事少  
為郎為郡似閒人

臘月

臘月滁州始覺寒  
年豐歲暮郡齋閒  
官供好酒何憂雪

天與新詩合看山日照野塘梅欲綻燒迴荒徑草猶斑  
吏人散後無公事門戟森森夕鳥還

李虛已

次韻和楊大年見寄

鼇冠三峰碧海寬雲謠初下藹芝蘭探珠宮裏驪龍睡  
織錦機中彩鳳盤藥砌蒼苔錢作點粉墻修竹玉為竿  
閒從莊蝶親鳧舄曾得安期九轉丹

次韻和汝南秀才遊淨土見寄

長松繫馬放吟鞭  
水殿沉檀一炷煙  
苔破閒階幽鳥立  
草芳深院老僧眠  
桃花欲放條風後  
茶蕊新供穀雨前  
良會賞詩多狎客  
我無岐路近神仙

趙湘

春夕偶作

一夕衡門獨自開  
雨陰深巷少塵埃  
醉醒風傍池邊起  
坐久月從花上來  
何處夜歌初欲斷  
四鄰春夢未知回  
因思此興無人共  
時復孤吟步綠苔

贈張處士

應問秋雲學得閒飄然如不在人間青藤篋裏詩多怪  
紫栗枝邊藥更殷江客對碁曾賭鶴野僧分屐借登山  
仍聞昨日來城市又抱孤琴踏月還

王操

上李相公

弱冠登龍入粉闈少年清貴古來稀袖中詔草朝天去  
頭上宮花侍宴歸卓筆玉堂寒漏迴捲簾池館水禽飛



三台位近猶謙遜  
閒聽秋霖憶翠微

王巖

殘冬客次資陽江

淡雲殘雪簇江天  
策蹇遲回客興闌  
持鉢老僧來咒水  
倚船商女待搬灘  
沙翹白鷺非真靜  
竹映繁梅奈苦寒  
阮籍莫嗟岐路異  
舊山溪畔有魚竿

張維

庭鶴

戢翼盤桓傍小庭不無清夜夢煙汀靜翹月色一團素  
閒啄苔錢數點青終日稻梁聊自足滿前雞鶩漫相形  
已隨秋意歸詩筆更與幽棲上畫屏

玉蝴蝶花

雪朶中間蓓蕾齊驟開猶覺繡工遲品高多說瓊花似  
曲妙誰將玉笛吹散舞不休零晚樹團飛無定撼風枝  
漆園如在須為夢若在藍田種更宜

歸燕

社燕秋歸何處鄉羣離齊老稻青黃猶能時暫棲庭樹  
漸覺稀疎度苑墻已任風簷下簾幙却隨煙艇過瀟湘  
前春認得安巢所應免差池棟杏梁

宿後陳莊

臘凍初開茗水清煙村遠郭漫吟行灘頭斜日鳧鷖隊  
枕上西風鼓角聲一棹寒燈隨夜釣滿犁膏雨趁春耕  
誰言五福仍須富九十年餘樂太平

楊億

奉和御製社日詩

仙掌凌空沆瀣秋  
大田多稼似雲浮  
天邊霽景芙蓉闕  
江上殘芳杜若洲  
東觀羣儒宣宴樂  
南荆遺俗重嬉遊  
宸章忽降容瞻覩  
疑是神龜負九疇

別賦賞花

仙山靈沼五城西  
曉日花光照彩霓  
露濯冰蠶鋪瑞錦  
風吹水麝坼香臍  
芳葩散採添蜂蜜  
紅片狂飛雜燕泥  
曾識壺中舊春色  
桃源重到路猶迷

龍圖閣會宴應制

冊府藏書在紫微  
退朝稽古坐論思  
中天召宴衢樽滿  
乙夜觀文列象垂  
彩鳳翩翻巢綺閣  
靈龜天矯冠金碑  
大風發唱羣臣和  
元首康哉庶績熙

秘閣賜宴送右諫議大夫种放得假歸終南山  
應制

瑣闥聊輟卓囊封  
賜告歸尋一畝宮  
關路蒲輪千里遠  
巖扉蕙帳幾年空  
百壺天酒凝甘露  
二雅宸章掩大風

舊隱暫還非久住心期獻可沃堯聰

送張彝憲歸鄉

處處春波滿稻畦海棠零落子規啼一麾遠郡方留滯  
十里長亭又解攜後夜灘聲妨客夢初晴雲物入詩題  
到家為問田園事桃李猶應有舊蹊

次韻和衢州席刑部早秋

朱火熒熒向夕流林間一葉忽驚秋風來野渡聞漁笛  
霧斂晴天見蜃樓豔愛芙蓉開幕府香憐杜若老汀洲

使君鬢畔多元髮  
臨水登山不用愁

春郊即事

黃鸝百轉宿煙疎  
近郭行春獨駐車  
壠上勸耕聊問訊  
棠陰聽訟且躊躇  
遠林桑盡蠶成繭  
野水萍開獺趁魚  
幾處路旁垂苦李  
遊人不折意何如

留題黃山院

禾黍離離一徑通  
遊人攬轡即過從  
趨齋幽鳥聞疎磬  
出定高僧記偃松  
夜半龕燈凝古殿  
雨餘巖溜迸前峰

昔年曾此題名處素壁敲斜翠蘚重

梁舍人奉使巴中

藥署深嚴纔草詔劔關迢遞忽乘輶霜天歷歷已猿苦  
山路駸駸笮馬驕梁苑寒風吹別袂瞿塘春水送歸橈  
紫垣遣使非常例應有星文動九霄

秋日有懷鄉國

長安久客逢搖落不獨悲秋更憶鄉潘岳二毛行欲變  
淵明三徑已應荒書裁尺素鴻難託夢遶重湖蝶自狂



遊宦十年歸未得塵纓却悔逐滄浪

休沐述懷寄秘閣錢少卿

風號電笑雨平階  
紈素微涼暗入懷  
畫枕乍成園吏夢  
晨蔬聊學太常齋  
名慙引籍通丹地  
心媿移文刻翠崖  
大隱金門猶自適  
日親方朔聽詼諧

代意

夢蘭前事悔成占  
却羨歸飛拂畫簷  
錦瑟驚絃愁別鶴  
星機促杼怨新縑  
舞腰罷試收紈袖  
博齒慵開委玉奩

幾夕離魂自無寐  
楚天雲斷見涼蟾

鶴

悵望青田碧草齊  
帝鄉歸路阻丹梯  
露濃漢苑宵猶警  
雪滿梁園晝乍迷  
瑞世鸞皇徒自許  
繞枝烏鵲未成棲  
終年已結雲羅恨  
忍送西樓曉月低

舊將

平生苦戰憶山西  
拊劔臨風氣吐霓  
戟戶當衢容駟馬  
髯奴繞帳列生犀  
新豐酒滿清商咽  
武庫兵銷太白低

髀肉漸生衣帶緩  
早朝空聽汝南雞

梨

繁花如雪早傷春  
千樹封侯未是貧  
漢苑漫傳盧橘賦  
驪山曾識荔枝塵  
九秋青女霜添味  
五夜方諸月溜津  
楚客狂醒朝已解  
水風猶是獵汀蘋

無題

巫陽歸夢隔千峰  
辟惡香銷翠被空  
桂魄漸虧愁曉月  
蕉心不展怨春風  
遙山黯黯眉常斂  
一水盈盈語未通

漫託鷓絃傳恨意雲鬢日夕似飛蓬

書懷寄劉五

風波名路壯心殘三徑荒涼未得還  
病起東陽衣帶緩  
愁多騎省鬚毛斑五年書命塵西閣  
千古移文媿北山  
獨憶瓊林苦霜霰清樽歲晏強酡顏

劉筠

懷舊居

毛竹千叢蔽野亭  
曉猿驚後亂峰青  
漢庭已奏三千牘

周室曾繙十二經紫殿深沉頻視草緇帷寂寞自飛螢  
振衣本為蒼生起肯向荀家祇聚星

梨

元光仙樹阻丹梯御宿嘉名近可齊真定早寒霜葉薄  
樊川初曉露枝低先時櫻熟煩羊酪遠信梅酸損瓠犀  
宋玉有情終未識蔗漿無奈楚魂迷

錢惟演

再次首唱韻和大年

雲變危峰萬里橫，  
簟鋪湘水一牀平。  
紅蘭受露消晨渴，  
綠蕙翻風析夜醒。  
逸少偶書葵扇貴，  
羊欣閑卧練裙輕。  
無妨天上芝泥熟，  
獨看瑤光近太清。

梨

紫花青蒂壓枝繁，  
秋實離離出上闌。  
東海圓珪無奈碧，  
崦州甜雪不勝寒。  
已憂仙珮懸珠重，  
更恐金刀切玉難。  
自與相如解消渴，  
何須瓊蕊作朝餐。

初秋

蜜脾初滿若榴紅  
秋意知侵玉井桐  
薤簟自憑南郭几  
穀中猶卧北窗風  
雲迷候雁辭遙塞  
露濕飛螢起暗叢  
病已不須傳七發  
粉箋香墨寄詩筒

送客不及

橋閣川長恨已多  
斑駁嘶斷隔雲蘿  
遙山幾疊迷朱旆  
芳草經時駐玉珂  
高鳥可能追夕照  
綠楊空自拂微波  
短轅白鼻何由得  
目送層樓一雁過

此夕

曲瓊斜挂影沉沉火齊屏風六曲深春瘦已寬連理帶  
夜長惟有砒寒金珠拋月浦空涵淚瑟怨蘭堂漫寄心  
碧玉可能攀貴德阮郎追騎更駸駸

秋日小園

碧簟涼生白袷衣庾園秋晚得幽期千房嫩菊金螢亂  
百本哀荷鈿扇敲日薄蘚花沿素壁雨淫蛙鼓占清池  
脩然自合蒙莊趣誰識無心似標枝

錢惟濟



苦熱

蘋末風休飛閣深  
亭亭日御漸流金  
火雲接影橫銀漢  
水鳥無聲下翠陰  
渴想孤山同飲露  
煩思楚殿獨披襟  
柘漿粗粝都無味  
衛玠清羸欲不任

李宗諤

代意

霧鸞曉影忽參差  
雲雨陽臺役夢思  
自是膠絃無續日  
不同珪月有圓時  
洞房斗帳承新愛  
河漢星橋隔後期

綺榭凝塵斷消息  
抒情空擬四愁詩

館中新蟬

雨過新聲出苑牆  
煙輕餘韻度回塘  
短亭疎柳臨官道  
平野西風更夕陽  
八斗陳思饒賦詠  
二毛潘岳易悲涼  
感時偏動騷人思  
不問天涯與帝鄉

陳越

休沐端居有懷希聖

玉甃銀牀蔭碧桐  
北窗珍簟水紋融  
衣裁練布如王導

扇執蒲葵學謝公瓊眉半和仙掌露蘭苔輕泛楚臺風  
若非冰雪神仙骨相樂誰同一笑中

任隨

鶴

何年玉羽別崑丘飛舞長親十二樓警露夜規瑤圃月  
翔雲高憶海天秋肯教渠畧知遐壽會向神區更遠遊  
正是溶溪煙水碧好陪青鳳飲澄流

劉鵬

舊將

強弩當年討不庭  
功成身退炳丹青  
囊沙澤畔知兵法  
聚米山前識陣形  
驥老未甘秋伏櫪  
劔閒猶覺夜衝星  
分茅錫土傳家牒  
鐘鼎還須為勒銘

館中新蟬

搖落何須宋玉悲  
齊庭遺恨莫沾衣  
池中菡萏香全減  
井上梧桐葉乍飛  
風促箏聲隨斷續  
日移磚影自光輝  
宜秋門外饒芳樹  
結駟那堪送客歸

丁謂

途中盛夏

山木無陰驛路長  
海風吹熱透蕉裳  
渴思西漢金莖露  
困憶南朝石步廊  
江上綸竿輸散誕  
林間冠褐負清涼  
下程欲選披襟處  
滿眼蘋桐與佛桑

梨

搖搖繁實弄秋光  
曾伴青稗薦武皇  
懸圃雲腴滋紺質  
上林風馭獵清香  
尋芳尚憶瓊為樹  
蠲渴因知玉有漿

多少好枝誰最見  
冒霜丹顆倚鄰墻

山居

雷化以南山多零陵藿香芬芳襲人動或數里

洞口清香徹海濱  
四時芳馥四時春  
山多綠桂憐同氣  
谷有幽蘭讓後塵  
草解忘憂憂底事  
花能含笑笑何人

嶺南有含笑花

爭如彼美欽  
天壤長薦芳香奉百神

陳亞

懷舊隱

多愧當年未第間  
卜居人外得清閒  
排聯花品曾非僭

愛惜苔錢不是慳  
秋閣詩情天淡淡  
夕溪漁思月彎彎  
而今慚厚明朝祿  
敢念藏愚莫買山

張及

贈杜鼎昇

鼎昇字大舉形神清秀有古人之風  
夫婦皆八十餘每遇芳時好景選勝

借行人皆羨其  
高年逸樂云

家本樊川老蜀都  
世家冠劍豈寒儒  
筆耕尚可儲三載  
酒戰猶能敵百夫  
僻愛舜琴湘水弄  
每懸孫畫醉仙圖  
孟光笑語長相逐  
喚作梁鴻得也無

詹中正

香山

浪兀孤舟一葉輕  
香山登步覺神清  
幾多怪石全勝畫  
大半奇花不出名  
猿狖盡當吟裏見  
煙霞祇向眼前生  
官身未約重來此  
酒滿螺杯月正明

穆修

江南春

杜若溪邊待釣船  
怨紅傷翠助鸝鶯  
戰回春色青蒲劍



買破韶光綠苻錢千嶂遠圍芳草國一江晴浸落霞天  
未知多感多愁客何處偷尋甕底眠

燈

黯黯有時當永恨依依何處照閒眠靜臨客枕愁寒雨  
遠出魚篷耿暝煙纖影乍敲還自立冷花時結不成圓  
銷魂猶憶江樓夜曾對離觴賦短篇

石延年

金鄉張氏園亭

亭館連城敵謝家  
四時園色鬪明霞  
窗迎西渭封侯竹  
地接東陵隱士瓜  
樂意相關禽對語  
生香不斷樹交花  
縱遊會約無留事  
醉待參橫月落斜

楊朴

莎衣

軟綠柔藍著勝衣  
倚船吟釣正相宜  
蒹葭影裏和煙卧  
菡萏香中帶雨披  
狂脫酒家春醉後  
亂堆漁舍晚晴時  
直饒紫綬金章貴  
未肯輕輕博換伊

魏野

謝長安孫舍人寄惠蜀牋

彩牋一軸敵瓊瑰喜見親題手自開  
遠勝浣花人寄到  
貴從視草客分來百張重疊霞初卷  
千色參差錦乍裁  
紅藥篇章方雅稱老夫無用擬封回

登原州城呈張筭從事

異鄉何處最牽愁獨上邊城城上樓  
日暮北來惟有雁  
地寒西去更無州數聲塞角高還咽  
一派涇河凍不流

君作貧官我為客此中離恨共難收

秋霽草堂閒望

草堂高迥勝危樓時節殘陽向晚秋野色青黃禾半熟  
雲容黑白雨初收依依永巷聞村笛隱隱長河認客舟  
正是詩家好風景嬾隨前哲却悲愁

林逋

湖上隱居

湖水入籬山遶舍隱居應與世相違閒門自掩蒼苔色

過客時驚白鳥飛賣藥比常嫌有價灌園終亦愛無機  
如何天竺林間路猶到秋深夢翠微

湖山小隱

道著權門便絕交一峰春翠濕衡茅莊生已憤鴟鳶嚇  
揚子休譏蠹蜓嘲滴滴藥泉來石竇霏霏茶靄出松梢  
琴僧近借南薰譜且併閒工仔細抄

湖上晚歸

卧枕船舷歸思清望中渾恐是蓬瀛橋橫水木已秋色

寺倚雲峰正晚晴翠羽濕飛如見避紅蕖香嬾似相迎  
依稀漸近誅茅地雞犬林蘿隱隱聲

西湖春日

爭得才如杜牧之試來湖上輒題詩春煙寺院敲齋鼓  
夕照樓臺卓酒旗濃吐雜芳薰巘嶠濕飛雙燕破連漪  
人間幸有蓑兼笠且上漁舟作釣師

夏日池上

蓮香如綺細濛濛翡翠窺魚裊水萍卷箔未生單簟月

凭闌初過一襟風，橫敲片石安琴薦。  
獨倚新篁，看鶴籠沈李凍醪，無寄與。  
可憐瀟灑興誰同。

西巖夏日

蕙帳蕭閒掩敝廬，子真巖石坐來初。  
為驚野鳥巢間乳，嬾過鄰僧竹裏居。  
新溜迸涼侵靜語，晚雲浮潤上殘書。  
何須強捉白團扇，一柄青松自有餘。

秋日湖西晚歸舟中書事

水痕秋落蟹螯肥，閒過黃公酒舍歸。  
魚覺船行沈草岸，

犬聞人語出柴扉蒼山半帶寒雲重丹葉疎分夕照微  
却憶清谿謝太傅當時未解惜蓑衣

深居雜興

隱居松籟細錚然何獨微之重碧鮮已被遠峰擎雙巘  
更禁初月吐娟娟門庭靜極零苔露籬援涼生裊菊煙  
中有病夫披白袷瘦行清坐詠遺篇

雜興

湖上山林畫不如霜天時候屬園廬梯斜晚樹收紅柿



筒直寒流得白魚石上琴樽苔野淨籬陰雞犬竹叢疎  
一闌兼是和雲掩敢道門無卿相車

孤山後寫望

水墨屏風狀總非作詩除是謝元暉溪橋裊裊穿黃落  
樵斧丁丁斫翠微返照未沉僧獨往長煙如淡鳥橫飛  
南峰有客鋤園罷閒倚籬門忘却歸

安福縣途中作

詩景紛拏且按鞭壞橋危磴已鳴泉雲根道店多沽酒

山崦人家亦種田  
谷鳥驚啼衝宿雨  
野梅愁絕閉寒煙  
玉梁閣卓堪行徧  
回得臨江即上船

山園小梅

衆芳搖落獨暄妍  
占盡風情向小園  
疎影橫斜水清淺  
暗香浮動月黃昏  
霜禽欲下先偷眼  
粉蝶如知欲斷魂  
幸有微吟可相狎  
不須檀板共金尊

剪綃零碎點酥乾  
向背稀稠畫亦難  
日薄縱甘春至晚  
霜深應怯夜來寒  
澄鮮祇共鄰僧惜  
冷落猶嫌俗客看

憶著江南舊行路酒旗斜拂墮吟鞍

嘗茶次寄越僧靈皎

白雲峰下兩槍新膩綠長鮮穀雨春靜試恰如湖上雪  
對嘗兼憶剡中人瓶懸金粉師應有筋點瓊花我自珍  
清話幾時搔首後願和松色勸三巡

寄題歷陽馬仲文水軒

占得幽居近郭西水軒風景獨難齊煙含晚樹人家遠  
雨濕春蒲燕子低紅燭酒醒多聚會粉箋詩敵幾招攜

旅遊今日堪搔首  
搖落山城困馬蹄

西湖孤山寺後舟中寫望

天竺橫分景色寬  
孤山背後泊船看  
林藏野路秋偏靜  
水映漁家晚自寒  
拂拂煙雲初澹蕩  
蕭蕭蘆葦半哀殘  
春鋤數點誰驚起  
書破晴雲粉字乾

酬畫師西湖春望

笛聲風暖野梅香  
湖上凭闌日漸長  
一樣樓臺圍佛寺  
十分煙雨簇漁鄉  
鷗橫殘葑多成陣  
柳映危橋未著行

終約吾師指芳草靜吟閒步岸華陽

王初

延平天慶觀

劍化江邊彩構新層臺不染玉梯塵千章隱篆標龍簡  
一曲空歌降鳳鈞嵐氣濕衣雲葉晚天香飄戶月枝春  
盟金早晚聞仙語學種三芝伴羽人

青帝

青帝邀春隔歲還月娥孀獨夜漫漫韓憑舞羽身猶在

素女商絃調未殘  
終古蘭巖棲偶鶴  
從來玉谷有離鸞  
幾時幽恨飄然斷  
共待天池一水乾

書秋

千里南雲度塞鴻  
秋雲無跡淡平空  
人間玉嶺清霄月  
天上銀河白晝風  
潘賦登山魂易斷  
楚歌遺珮怨何窮  
往來未得如張翰  
欲繪霜鯨碧海東

自和書秋

隴首斜飛避弋鴻  
頽雲蕭索見層空  
漢宮夜結雙莖露

閭闔涼生六幕風  
湘女怨絃愁不禁  
鄂君香被夢難窮  
江邊兩漿連歌渡  
驚散遊魚蓮葉東

宋庠

二月花柳將盛忽有風  
雨絕寒戲呈東甫

二月尋芳已有期  
橫來風雨固難知  
潤添水榭千波漲  
寒勒林花十日遲  
曉匣氣昏鸞不舞  
寶絃聲縱雁頻移  
傷春遺恨君須會  
重煖山爐酌玉卮

閏十二月望日立春禁中作

閨歷先春破臘寒  
綵花金勝寵千官  
冰從太液池邊動  
柳向靈和殿裏看  
瑞氣因風生禁仗  
暖輝依日上仙盤  
須知聖運隨生殖  
萬國年年共此歡

寄子京

八年三郡駕朱輪  
更忝鴻樞對國鈞  
老去師丹多忘事  
少來之武不如人  
車中顧馬空能數  
海上逢鷗想見親  
惟有弟兄歸隱志  
共將耕鑿報堯仁

重展西湖



綠鴨東陂已可憐更因雲竇注西田鑿開魚鳥忘情地  
展盡江湖極目天向夕舊灘都浸月過寒新樹便留煙  
使君直欲稱漁叟願賜閒州不計年

宋祁

兄長莒公赴鎮道出西苑作詩有長楊獵近寒  
熊吼太液歌餘瑞鵠飛語意警邁予輒擬作一  
篇

寶樓斜倚闕西天北轉樓陰壓素連白雪久殘梁複道

黃頭空守漢樓船  
塵輕未損朝來霧  
樹暖才容臘外煙  
弭節不妨饒悵戀  
待歌魚藻記他年

寒食假中作

九門煙樹蔽春廬  
小雨初晴潑火前  
草色引開盤馬地  
簫聲催暖賣餠天  
縈絲早絮輕無著  
弄袖和風細可憐  
鰲署侍臣貪出浴  
珉糜珠餡媿頒宣

落花

墜素翻紅各自傷  
青樓煙雨忍相忘  
將飛更作迴風舞

已落猶成半面粉  
滄海客歸珠迸淚  
章臺人去骨遺香  
可能無意傳雙蝶  
盡付芳心與蜜房

九日宴射

佳節憑高駐綵旗  
亭皋霧罷轉晨曦  
朔堦間羽集號猿  
後臺外塵飛戲馬  
時芳菊治疴爭泛  
蕊丹萸辟惡徧傳  
枝明年此會知何  
處醉玉頽山不用  
辭

晏殊

初秋寓直

絳河星斗夜闌干  
禁署沉沉閉九關  
上帝冊書羣玉府  
仙人宮闕巨鼇山  
涼蟾影度秋陰薄  
促漏聲來夜唱閒  
擁鼻吟多欲愁絕  
巖鐘淒斷樹烏還

假中示判官張寺丞王校勘

元已清明假未開  
小園幽徑獨徘徊  
春寒不定斑斑雨  
宿醉難禁滌滌杯  
無可奈何花落去  
似曾相識燕歸來  
遊梁賦客多風味  
莫惜青錢萬選才

夏竦

上元應制

魚龍曼衍六街呈金鎖通宵啟玉京  
冉冉遊塵生輦道遲遲春箭入歌聲  
寶坊月皎龍燈淡紫館風微鶴燄平  
宴罷南端天欲曉回瞻河漢尚盈盈

韓琦

次韻和子淵學士春雨

天幕沉沉淑氣溫雨絲輕輕墜雲根  
洗開春色無多潤染盡花光不見痕  
寂寞畫樓和夢鎖依微芳樹過人昏

堂虛坐密珠簾下試問淳于醉幾樽

周沆著作宰秀州嘉禾

庇身名邑得嘉禾銅墨猶嗟滯俊科前席未期宣室召  
聞絃還繼武城歌酒旗穿柳春堤迴漁艇藏花夕唱和  
對此不勞披縣譜且求新句解詩魔

上已

遠道今逢祓禊辰雨餘風物一番新等閒臨水還思舊  
取次看花便當春絮雪暖迷西苑路車雷晴起曲江塵

臺英正約尋芳會誰是山陰作序人

北塘避暑

盡室林塘滌暑煩曠然如不在塵寰誰人敢議清風價  
無樂能過白日閒水鳥得魚長自足嶺雲含雨只空還  
酒闌何物醒魂夢萬柄蓮香一枕山

北塘春雨

葉葉輕雲帳薄羅坐看膏澤灑庭柯風前芳杏紅香減  
煙外垂楊綠意多聲落檐牙飛短瀑點勻池面起圓波

晴來西北憑闌坐，拂黛遙峰濯萬螺。

清明獲鹿道中

尺雪征途已倦行，那堪寂寞過清明。  
農居近古鞦韆野，懸堞成墟睥睨平。  
只見靚粧矜節服，更無閒地匝春耕。  
山川寓目皆形勝，可惜虛屯百萬兵。

御製後苑賞花釣魚奉旨次韻

花簇香亭萬朶開，瑤輿高自九關來。  
輕陰閣雨迎天步，寒色留春送壽杯。  
仙吹徹雲終縹渺，恩魚逢餌幾徘徊。



曾參二十年前會今備台司得再陪

樞廷對竹

一紀前曾對此君依然軒檻喜重新丹心自覺同高節  
青眼相看似故人不雜囂塵終冷淡飽經霜雪尚精神  
樞廷豈是琴樽伴會約幽居稱幅巾

從駕過金明池

帳殿深沉壓水開幾時宸輦一遊來春留花樹陰成幄  
雨漲池波色染苔空外長橋橫帶竦城邊真境闢蓬萊

崇朝侍宴臨雕檻共看龍艘奪錦回

丙午上巳瓊林苑賜筵

春光濃簇寶津樓樓下新波漲鴨頭佳節難逢真上巳  
賜筵榮入小瀛洲仙園雨過花遺靨御陌風長絮走球  
禊飲不須愁巨白清明來日尚歸休

上巳會興慶池

興慶池頭三月三柳如拖綬草如衫禊觴臨水筵相屬  
文鷁凌波尾競銜花雨亂飛紅撲簌峰螺遙聳碧巉巖

芳辰况任遊人樂不必低將席帽撓

登廣教院閣

岑寂禪扉啟畫闕公餘為會一開顏  
高臺面壘包平野老柏參天礙遠山  
花去春叢蝴蝶亂雨勻朝圃桔槔閒  
徘徊軒檻何時下直待前枝倦鵲還

郡圃春晚


溶溶春水滿方塘闌檻風微落蕊香  
盡日楊花飛又歇有時林鳥見還藏  
沉疴不為閒來減流景知從靜處長

欲戰萬愁無酒力可堪三月去堂堂

御選宋詩卷四十五

謹案第十六頁後四行霽後望山中春雪刊本脫  
望字據小畜集增





總校官庶吉士臣侍朝  
校對官檢討臣蕭九成  
騰錄舉人臣李駟